

# Četvorka uhapšena zbog zločina u Janji MEĐU UHAPŠENIMA I INSPEKTOR OSABiH

Pripadnici Državne agencije za istrage i zaštitu (SIPA) uhapsili su na području Bijeljine i okoline, po nalogu Tužilaštva BiH, Zorana Bogdanovića (1960), Milana Đokića Miću (1950), Ljubišu Ikića (1952) i Branislava Trišića Branu (1961) zbog sumnje da su počinili krivično djelo zločin protiv čovječnosti, odnosno da su tokom rata nezakonito zatvarali, premlaćivali i zlostavljali civile na području Janje.

## Napad

Osumnjičenoj četvorki se na teret stavlja da su u svojstvu pripadnika Centra javne bezbjednosti (CJB) Bijeljina i Stanice milicije Janja pri Ministarstvu unutrašnjih poslova Republike Srpske (MUPRS), od 1992. do 1994. godine učestvovali u širokom i sistematičnom napadu na bošnjačko stanovništvo.

Na teret im je stavljeno da su nezakonito zatvarali civile i vršili pretrese na području Janje i okoline. Nezakonito privođene žrtve su tom prilikom mučene, zlostavljane i premlaćivane. Tri osobe su od posljedica zlostavljanja smrtno stradale, a veći broj žrtava pretrpio je fizičke i psihičke ozljede, koje su ostavile trajne posljedice na njihovo zdravlje.

Usljed progona stanovništva, svakodnevnim odvođenjem, pritvaranjem, mučenjem i zlostavljanjem, stvarana je atmosfera stalnog straha za život i sigurnost bošnjačkog stanovništva, čime je bošnjačko stanovništvo bilo prinuđeno da napusti područje Janje, plaćanjem novčanih iznosa pripadnicima VRS-a za pre-



O mjerama će biti odlučeno naknadno

lazak prema teritoriji pod kontrolom Armije RBiH ili prelazak u Srbiju, a stanovništvo koje je ostalo u Janji odvođeno je na prinudne radove, u logor Batković ili je korišteno kao živi štit u borbama na Majeveci, saopćeno je iz Tužilaštva BiH.

Pripadnici SIPA su pretresli i nekoliko lokacija, a osumnjičeni će biti predati u Tužilaštvo na saslušanje, nakon čega će biti odlučeno o daljnjim mjerama.

Iz Tužilaštva je saopćeno da je osumnjičeni Trišić aktivni inspektor Obavještajno-sigurnosne agenci-

je BiH (OSA). U OSA smo pokušali dobiti komentar u vezi sa hapšenjem njihovog uposlenika, ali do zaključenja ovog izdanja Oslobodjenja nisu odgovorili na naš upit.

## Istraga

Podsjetimo, ovo nije prvi slučaj da je uposlenik ove državne institucije predmet tužilačke istrage. Naime, nakon okončanog sudskog procesa, Apelaciono vijeće Suda BiH prošle godine je pravosnažno i na sedam godina zatvora osudilo čelnika Odjela za borbu protiv organiziranog kriminala OSA BiH Muhidina Bašića i to zbog zločina počinjenog na području Vareša. Bašić je skupa sa Mirsadom Šijkom (osuđen također na sedam godina zatvora, op.a) proglašen krivim za silovanje ženske osobe hrvatske nacionalnosti.

Bašić je, inače, u ratu bio načelnik Odjela službe državne sigurnosti Olovo, a Šijak, vojni policajac, pripadnik 122. lake brigade Armije RBiH.

**A. B. Č.**